

lavahli maiatuhluhlu hla'alua

ma kilaliali Miatungusuna, marua ucani sahli kilaliali, puavacangu
matumuhlu kiu'u, masahlina kiahlahlamu tarutarutukuhl siruamia kiu'una,
marua sitamahlunga pangili aruami cacalaisa, apumiasa hlikilaliali malitunlu
tarutarutukuhl ngahlana kiu'u, tuahlu apatalakiahlu cucutahlana hla
sitakuangusipina, maru aahli umucumu hlarangirangi, papuhla patausitakua
miataiarana, mataingalu ia mara anuanu tuahlu cucutahlanata maru
vuvulunga aparavacuku tahlana, maru ucani mataingalu pakaritukuhla
aruamimia kiu'u ma kaupaupangana, cucutahlana tam pualisuhluisana,
ta'iaraisaka pautuamacuisana cucutahlanana ihlaisa hlalangu 'ihlicu
takuliacu, pimanganu maiatuhluhlu cucutahlana, kuhlaisa tamuucu
pualisuhluisana cucutahlanata, kana'ana ia ihlaisa maiatuhluhlu Hla'aluana
lavahlina.

ma kuraraua kiatasu'aru Miatungusu siaucani aarina ia, tumua
hlahlahlusa miararumana taruacucuvungu tapuhlahliana, ihlaisa raahlina
malialualu hlahlusa kilaliali apikaunga, kilupungu kilaliali makuakuana ia,
malialualua raahlina pahlu malalalangu, makicunguhlu siausua sahli ia,
lualikihli, sipuavacangu matumuhlu ngahlan akiu'u, maru mumua

sikisuahlamama, ma aisa kani'i lavahlina sakisupakaritukuhlacu, amihla
lavahlina ia tuahlu paramanga'a ahla'a kuapuaruma, ahla'a rutahlu
Hla'alua, hlimungahlu ahla'ana rutahlu, aunana mukakakua lalavahlia,
kani'i ia saparamanga'acua lavahlina, aparaukauka apukakuatatapirasua,
saicucunguhlacua tahlana Hla'aluana papapaci, marua tapililikasu, maru
mumua apatisangalu muruhlu ahla'a, angihlicuisa kucurungahla,
takuacahliaka tahlana Hla'alua, sa aparahlalangu 'ihlicucua Hla'aluana.

kuhlaisa, sahli kilalialina pingahla lavahlina, ku ucanisana mumua
tapuhlahliana, ma patuku vahlita tapuhlahliana, hlilumuka asasaru,
minisuacu lumumuku asasaru tapuhlahliana, lavahlina marahlalanguta
Hla'alua ahlama kiariari, akuisa hlipararahlamana, patasuuru mangusipi ma
sasaruanana, tarutaruatukuhluka ngahlana mangusipi, kuhlaisai,
tuahlu manaka cucu'u arupakarisana, ausi lavahlinaka, miaulusuitamana
kiariari, karukuhluatahlata apaiatuhluhlu lavahlina, maci muruacuka, ahla
tarikicangihlina, karukuhlu maiatuhluhlu tahlana.

(文章大意 僅供參考) ※字數限 200 字

守護拉阿魯哇族的山蘇

有個植物非常特別，具備法力，可以驅邪避凶、保護族人，非常敬畏它，就是拉阿魯哇的守護者—山蘇。相傳有外族攻擊本族部落，他們走進山蘇林中，被山蘇迷幻往反方向離開部落，下次他們再攻擊部落不僅被迷幻，還紛紛放下武器，族人看見外敵手無寸鐵，便捉住他們。

山蘇被種植於集會所入口兩側，希望集會所可以不受惡靈之打擾。相傳過去在森林中遇到山蘇，還必須用山蘇的語言打招呼，也是祈求保護狩獵或征戰之族人。